



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Shafali Verma nem ICC Player of the Month naroküm agütsü

Far-right candidate Jose Antonio-i Chile tir election kokogo



VOL. XXIII ISSUE NO. 70 (ADOK 70)

DIMAPUR

SANGTENNÜ (TUESDAY)

LUCHII (DECEMBER) 16, 2025

₹ 5.00

Nagaland nung E-Challan service tenzükogo

Dimapur, December 15, 2025 (TYO): Nagaland nung digital governance aser traffic management tajungba akümtsü nükjidong nung Motor Vehicles Department, Nagaland-i December 15, 2025 nü E-Challan service tenzükogo.

District Transport Office, Dimapur nung tetushi süa jaoker Commissioner & Secretary, Transport Department, Robert Longchari-i Nagaland nung E-Challan service tenzükja liasü.

Traffic Police, Home Department aser National Informatics Centre (NIC) tsüngda amalitepa aser yaritepa iba mapa tenzüktetba atema tenüngsang agütsür, ta pai ashi.

Iba digital system takok ngua inyaksü aser mapa akümtsü asoshi line department balala tsüngda amalitep alitsü aser yaritepsüba kanga tongtipang lir ta Robert Longchari-isa ashi.

E-Challan service ajanga sen amshiba anentsü aser tim masüba maparen agientsü. Iba mapa ajanga tashishitsü melii inyaksangshitsü aser sensotem mapa kanga mebulutsü, ta paisa ashi.

"E-Challan system tenzükba ajanga gari lendongtem azioktsü, kechiyong tang nungibo traffic aibelenba ajak putettsü, zülüoka ayutsü aser bushitepsü. Iba ajanga nisung ajaki tebilemtsü bena gari anishitsü aser traffic rules sülen anidaktsüsa akümtsü" ta Robert-isa shisem.

Nagaland sorkari E-Challan system ya district ajungalen tenzüksü sentong lir aser tarutsü nung automatic cameras enoktsü

aser data collection tashi aittsü ta paisa metetdaksü.

E-Challan mapa ajanga Nagaland asoshi sen bener arutsü, digital transport governance tajungba akümtsü aser "Viksit Nagaland" alizüng atongtsüba nung yaritepsü ta Robert-isa shisem.

"India nung transport digitization ya küm 20 shi inyaka arur aser iba ya Sarathi aser Vahan applications ajanga tenzükja liasü" ta Senior Technical Director & State Informatics Officer, NIC, Lanusungkum Aier-i ashi.

E-Challan system ya 2015 nungi tenzük aser tang tashi nung India kübok state 33 nung beshir aser Nagaland state 34 buba lir, ta paisa ashi.

National E-Challan Project ya Android based mobile app aser web interface adenba software application ka lir. Iba ya National Informatics Centre, MIETY, GoI ajanga CMV Rules 1989 aser Acts 1988 den putepa yanglu aser Traffic aibelenertem asoshi Transport Enforcement Officers aser Traffic Policemen-i mapa inyaksü lateta lir ta Lanusungkum-i metetdaksü.

E-Challan system ajanga road traffic rules sülen manidakertem dangi electronically generated fine slips yokor aser iba ajanga paper challan system melenzüker, ta paisa ashi.

Iba sentong nung mendenji Deputy Transport Commissioner Yaongsanglee Chang liasü aser Transport Commissioner Nagaland Elias T Lotha-i anküp tepela o jembi.

Nagaland Congress-i "Vote Chor, Gaddi Chhod" Maha Rally nung aden

Dimapur, December 15, 2025 (TYO): All India Congress Committee (AICC)-i Ramlila Ground, New Delhi nung otsüsütsü akerba "Vote Chor, Gaddi Chhod" Maha Rally nung Team Nagaland Congress denogo.

Team Nagaland Congress nungi teshimtet züngsem 13 liasü aser parnok rongnung AICC Minority Department National Coordinator Rajesh Kumar Sethi densema liasü. Iba telok ya NPCC President aser Member of Parliament Supongmeren Jamir lenisüba kübok liasü ta Communications Department NPCC-i sangdong ka nung ashi.

AICC President Mallikarjun Kharge aser Leader of Opposition Rahul Gandhi nati anir agiba rally nung India kübok tesem balala nungi nisung lakh ana-asekma aden. BJP sorkar aser Election Commission of India (ECI) tsüngda tesentaktep aliba atema

public-i mepelaba sayua iba sentong agiogo ta NPCC sangdong nung shia lir.

"Vote Chori" anema linük kübok tesem balala nungi 5 crore signatures tema bendena liasü. Iba nung Nagaland nungi 2 lakh signatures tema agütsüogo aser iba ajanga Nagaland nung alirtemi democratic tangatetba aliba sayur ta parnokisa ashi.

Rahul Gandhi-i tongti osangbener senden asem tashi amenba aser linük matsüngdang documentary kulitem sayuaka, Election Commission-i ola madoker ta NPCC-isa metetdaksü.

Iba rally nung NPCC General Secretary Akunnuo, NSUI Nagaland President aser par telok, IYC Nagaland President aser par telok, Mahila Congress President, Dimapur aser Kohima nungi DCC Presidents aser Minority Department Chairman, NPCC nung aden.

Advent Christmas nung nübor tajungba tenzüksü ajungshitep

Dimapur, December 15, 2025 (TYO): December 12, 2025 nü State Banquet Hall, Kohima nung State Advent Christmas mungogo.

Iba sentong ya "Immanuel: God with us in our service" omen nung ajemdaker amung.

"MLA tem aser sorkar tongti ketdangsürtem nem nübor tenzüksü atema tebilemtsü khuret tulu agüja lir aser iba ya nenok jenjang aser tashi agüja aliba tenzüksüla" ta Chief Secretary, Sentianger Imchen, IAS-i Christmas salem osang abendang lemsatop.

"Last Supper nung Yisui par nütsüngtem tetsüng shitoktsü anungji asenokia Yisui tenzükba mapa inyakba nungi angazüksüla. Meimchir tenzükba dang nungi tematiba tamangba yimsü mali ta Woodrow Wilson-i shia lir. Anungji asenoki külem meimchirtem ajungtsü atema inyaksübaji tematibaji" ta pai ashi.

"Iba Christmas mongpu ajanga sorkar tenzükba wadang nung alir ajaki timi ketdangsütsü, aria bilemba shisatsü alitsü, aser nübor dak rangloker lenisüba inyaksü ajungmesotsü imlar" ta Sentianger-isa ashi.

Chief Minister, Dr. Neiphiu

Rio-ia o jembidang MLA tem aser sorkar ketdangsürtemi bendanga agüja aser ajemalua tenzüksü ayongzüker.

"Nendaka aser bendanga agüja tenzükba ajanga kijatem dangi dang masü saka kibongtem aser state ajunga asoshi temoatsü bentsür arutsü" ta pai ashi.

"Tsüngremi kü taküm kanga danga aochia len anir arur. Taküm ya kü asoshi kanga dang tongtipang küm ka lir kechiyong kinungtsü küna kibong kümer küm 50 ajungba benjungogo aser iba dak alila public tenzükba wadang nung ajemoker küm 50 abensaogo" ta Dr. Rio-isa ashi.

Iba asoshi pai külem MLA tem, sorkar ketdangsürtem aser teyariteper ajak dang pusema nungitba aser amalitep aliba atema pelaba metetdaksü.

"Christmas mongpu mapang asenok ajaki temulungjang renemshidi, asen tanüla taküm tasen kümshidi, kati ka ajungmesotepdi aser Christmas tetezü- aria bilemba, ajemaluba aser tenzüksü tangatetba nung ammetdi" ta Dr. Rio-i ayongzüker.

Iba sentong nung onük jembirji Most Rev. Dr. James Thoppil liasü aser pai "küm piyong nung mazüngtiba mapangji Christmas

lir, ajisüaka nübortemi Christmas nungi 'Christ-miss' mesüdaktsütsü atema Christ mamadoktsüla" ta ashi.

"Christmas mapang JOY ta asüba nung J ya Jesus, O ya Others, aser Y ya Yourself lir. Asenoki Yisu mezüng südaktsüra, iba sülen tangar anepalura aser tatamsa asen asoshi bilemra chichiba tepela angur" ta Dr. James-i tesentepertem dang ashi.

Jungkai Adok 3:20 nung ajemdaker paisa tesentepertem dang Christmas shia Khristai asen taküm melenshitsü atema asen mulungjang kishi nung akoshir ta ashi.

"Asenok ajaki taküm Christmas nung asen mulungjang nung Yisu aيتدaktsüdi, Pai sayubatem ama alitsü merangdi. Iba ajanga asenoki chichiba tepela, yimjung aser Christmas mongpu indang tetezü ajangshitsü. Asenok ajak külem meimchir tenzüksü atema aja anungji Yisu ama alitsü merangdi" ta Dr. James-isa ayongzüker.

Iba sentong nung mendenji State chaplain Rev. Izieteilung Teriang liasü aser AHOds/HODs p Angami Christian Revival Church nungeri ken ajanga shilem agia liasü.

Niki Sumi-i Naga frontal organizations longjemtsü ayongzüker

Dimapur, December 15, 2025 (TYO): Naga yimten tebilemtsü koktettsü atema Naga frontal organizations ajak longjemtsüla aser Naga yimten teloktem o Naga nunger tsüngda tesentaktep yanglutsü nüngdaker ta NSCN/ GPRN (K) & president Gen. (Retd) Niki Sumi-i ashi.

"Naga yimten teloktem sasap nunga telemsa adoka lir, anungji civil societies longjema melira Naga yimten teloktem kin mesüra yimtsüngtem nung ajemdaker lemsar. Naga yimten telok aika akümba ya Naga yimten teloktem melongjemba dang masü saka civil society nung telemsa aliba ajanga lir" ta Niki Sumi-i ashi.

Hombarnü Ceasefire Supervisory Board office nung osangbener den jembidang pai iba tebilemtsü lemsatapa liasü.

"Naga lennir aika India tenüng nung inyaker. Parnoki Naga nunger asoshi masü saka kija ajangzüksü mechi nung Naga nunger tsüngda telemsa adokdaksür. Naga nunger tongtipang teloktem- United Naga Council (UNC), Eastern Nagaland People's Organisation (ENPO), aser Nagaland Tribes Council (NTC) ka akümtsüla" ta paisa ashi.

"India sorkari yimten tebilemtsü atsülanga odaktsütsü atema inyaker aser parnoki bilemer Naga nunger anibeleva anentsü, ajisüaka Naga nunger



Niki Sumi

suwar masü. India sorkari chichiba telemtetba ka magütsüi olemtep tembangnür asütsü akok saka Naga nungeri repranga atadar aser kobi melii angatettsü" ta Niki Sumi-isa ashi.

"Naga nunger kin aser yimtenren lennirtemi New Delhi den parnok inyaktepba memetedaktsü public ashioktsür. Lennir aikati high-level ministerial meetings amenba indang jembir saka item ya Indian intelligence agencies-i meputep adokdaksütsü atema ketdangsüa inyaker" ta paisa tai tongloksü.

NSCN/GPRN (K) ya Framework Agreement mesüra Agreed Position nung maden. Telungpur telok balala tenzükba aotsü nükjidong kecha mali. Naga nunger shisashirtem aser Naga yimtenren teloktemi iba ya shisadangtsüla mesüra asenok

Punjab nung movement ama anenadoktsü ta Niki-isa tekümdangtsü ashi.

India sorkari Manipur, Arunachal Pradesh, aser Assam nung Naga nunger aliba tesemtem Nagaland den "Integration" asütsü magizükba den NSCN-IM-i Flag aser Constitution meshia masetshii noktakba ya meputeper, ta pai ashi.

"Integration medeni kodaser Flag mesüra Constitution ajanga Southern Nagas ayimjemtsü? India sorkari Manipur mesüra Arunachal arrtsütem raksatsü mulungtsü asü? Integration melira parnok asoshi Flag aser Constitution jenjang kecha malitsü" ta Niki Sumi-isa ashi.

Framework Agreement nung kechisa zülua lir memetet, ajisüaka NNPGs-ibo tanü tensa den putepba agizüksü aser tarutsü nung tanüngba temetentem asoshi inyaka aotsü mulungba atema tenüngsang agütsür, ta paisa shisem.

"Naga shisashirtem aser public-i agreements ana nung kechi lir züngdangang aser asangsangji agizükang. Yimjung olemtep ya ajungtsü mesüra majungtsü tia ka nung lir anungji asenoki tangatetba tsütsü tekong merangtepba toktsür political settlement asoshi temulung agütsütsüla" ta Niki Sumi-isa ayongzüker.

DC Kohima-i Khonoma Base Camp semdang



Deputy Commissioner Kohima, B. Henok Buchem den ketdangsür aser Western Dzükou morok mi remsepba mapa inyaktertem December 15, 2025 nü base camp Khonoma nung tangokba noksa ka yangi angur.

Dimapur, Luchii/December 15 (TYO): Deputy Commissioner Kohima, B. Henok Buchem, NCS den SDO Civil Sechü-Zubza Imliakum, Nodal Officer Thejangulie Zao, District Commandant HG, CD & SDRF Wopenthung aser Police, Forest & Fire Emergency Services nungi ketdangsür temi December 15, 2025 nü Western Dzükou morok mi remseptsü merangba mapa inyaker indang base camp Khonoma semdanga liasü.

Iba mapang Khonoma Youth nungi lenirtem, SDRF aser sorkar agencies balala nungi ketdangsür temi tang morok mi indang tensa lemsatepa liasü.

Hombarnü inspection team ka yok aser parnoki arem nung mokozü adokba lir saka mi jangruba mali ta osang bener aru, ta parnoki ketdangsürtem dang ashi.

Mokozü alonga alidak Khonoma Youth volunteers, SDRF aser Forest Department

personnel tem oa mokozü ya remsepoho ta ashi.

Mokozü alonga aliba anendaktsüsu atema IAF helicopter tem yoka tzü ainer aser jelia mera agiba ama Dzükou anüolen tesemtem khen atema shibanga lir ta parnokisa metetdaktsü.

Iba lendong mapang stakeholders temi yariba atema pelar ta Khonoma Youth ajanga ashi aser Angami Youth Organisation (AYO) sentong nung SDRF ajanga jelia training agüja aliba yong volunteers temi 'rescue & response operations' ya agitet ta ashi.

Deputy Commissioner-i District Disaster Management Authority (DDMA) indang Chairman ama iba inyakyim nung amalitep akaba atema pelar, ta Khonoma Youth Organisation (KYO) indang Adviser-i ashi.

Deputy Commissioner lenisüba kübok iba takok anguba otsü ya sorkar nem

metetdaktsüsu, ta pai ashi.

Kharagpur nungi helicopter team den lanur volunteers aser SDRF personnel temi mi ya remseptetogo ta ashi, ajisüaka paroki ano Western Dzükou sema jajatsü telemtetba agia liasü.

Iba mapang Deputy Commissioner, Kohima, B. Henok Buchem-ia Tsüngrem nem tenüngsang agütsü aser lokti tentet balala, talisa Khonoma nung aliba nüburtemi nisung dang taochi sayua mapa tajung balala inyakba atema pelaba lemsatepa liasü.

Hombar anepdang Advisor NSDMA & NRE, Z. Nyusietho Nyuthe; Deputy Commissioner B. Henok Buchem; Nodal Officer Kohima, Thejangulie Zao aser Assistant Manager, Response & Communication NSDMA, Rendemo Shitio nungeri helicopter ka amshia iba morok mi tensa asadangtsü atema Western aser Southern Dzükou tesemtem sema liasü.

Wakching nung Nagaland Rural Bank branch tasen semzüik

Dimapur, Luchii/December 15 (TYO): Wakching nung December 13, 2025 nü Nagaland Rural Bank (NRB), Wakching Branch semzüika liasü.

Sentong tenzüka sarasademba sülen Longnyei Konyak, SDO (Civil), Wakching ajanga pela agizükba o jembi aser Velayutham Sadhasivam, Chairman, Nagaland Rural Bank ajanga

bank nükjidong lemsatepa liasü.

Sentong nung yimtsüing lenirtemia o tatsütsü jembi.

Sentong akhumdong ka ama Advisor, Geology & Mining and DUDA, W. Chingang Konyak aden, kong Atai Konyak, Branch Manager, NRB menden liasü aser Y. Taiching Konyak, President, Konyak Union (Wakching Unit) ajanga melepzüing o jembi sarasadema sentong tembang.

Peren nung Assam Rifles-i lenirtem den senden amen

Dimapur, Luchii/December 15 (TYO): Assam Rifles temi Peren district kübok Heningkunglwa yimtsüing nung Gaon Buras, Village Chairmen aser Civil Society Organisation lenirtem den Security Meeting ka ayongzüka mena liasü.

Iba senden nung tejangja nübu 15 dena region nung civilian aser military tesendaktep tajung aliba sayu.

Kati ka dak tamang akaba tashi itsütsü, tali amalitep akatsü aser yimjung aser security dak sendakba tebilemstütem angatetteptsü nükjidong nung iba sentong ya ayongzüik.

Iba mapang Assam Rifles temia sunepa alitsü atema

nüburtemi shilem agitsü kanga tongtipang lir ta ashi aser GBs, Chairmen aser CSO lenirtemi parnok taginüba aser parnoki timtem balala ajuruba indang lemsatepa liasü.

Jelia lendong timtem nungi kumzüksü, mapang shidak nung osang-tsüsang lemsateptsü aser teka amteper inyaktsü indang temulung rapoka jembia liasü.

Telungjem adokdaktsütsü, ozüing alema inyaksangshi mesüdaktsütsü aser amalitep adokdaktsütsü asoshi civil society temi shilem agitsü indanga iba senden nung jembi aser Assam Rifles temia nüburtem asoshi maneni inyaktsü ashi.

Mokokchung nung Winter Night Carnival tenzükogo



Wb.Temsuchuba Jamir, SDO Civil -i Winter Night Carnival lapoktsür aser Class of Music Mokokchung tanurtemi Stall lapoka aliba tesemtem sema Christmas ken tena yimdong süa jajaba mapang tangokba.

Mokokchung Luchii/December 15(TYO) : Mokokchung nung taonung 6 Buba Winter Night Carnival SDO Civil Mokokchung Wb.Temsuchuba Jamir-i Town Square Police Point Mokokchung nung meraket keta tenzüksüog.

Iba sentong lapoktsür kelen Wb.Temsuchuba Jamir-i mapang tatsüka agia jembidang Mokokchung nüburtemi pei yanglutetba chiyungtsü tapu balala yanglua yoktetsüsa maangka agitettsü asoshi Adventure and Motorsports Association Mokokchung-i(AMAM) iba sentong achayangba asoshi pelaba metetdakja ashi.

Wb.Temsuchuba Jamir-isa school aser college sodi mapang ka aser benjong amongtsü yongyaa ataba mapang ka nung iba Winter Night Carnival akaba ajanga kija, kibong aser loktitem asoshi Christmas benjong tali shisangdaktsütsü, anungi iba Winter Night Carnival benjong

amongdang Mokokchung tali tobur tali tobur jungdaktsütsü aser Christmas benjong meraksadaktsütsüsa mongangni ta adenshia alirtem ayongzüka jembi.

Iba sentong nung Tsüngremer lenisüba jazüka Wb.Tiaakum-i sarasademer tenzüik aser AMAM Tir Wb.Talisunep ajanga tarur pela agizükba o jembi iba den Kr.Kati aser Kr.Among tenati ken tajung ka tena sentong lemladaktsü iba sülen Class of Music Mokokchung tanurtemi Stall lapoka aliba tesemtem sema Christmas ken tena yimdong süa jaja-a liasü.

Takum 6 Buba Winter Night Carnival nung stall ajak agi 120 shi lapoka lir aser yangji chiyungtsü tapu balala, osettsüset tapu balala aser ano asayatsü asoshi tapu aika lapoka lir aser iba Winter Night Carnival December 17 tashi alitsü aser aonung 5:30 ako nungi 10:00 ako tashi alitsü.

NPP i Dimapur nung kitsük-kirong lendong ajurur alirtem semdang



Burma Camp, Dimapur nung kitsük-kirong lendong ajurur alir nem NPYF aser NPWF züngsem temi December 15, 2025 nü teyari agütsüba mapang tangokba noksa nung angur.

Dimapur, Luchii/December 15 (TYO): Temeim sayua aser arok tebilemstü khuret angateta National People's Party (NPP) indang frontal organisation National People's Youth Front (NPYF) aser National People's Women Front (NPWF) ajanga Burma Camp (East Block), Dimapur nung tang tesüsa kitsük-kirong lendong ajurur alirtem nem teyari agütsüba sentong ka agia liasü.

Iba kitsük-kirong lendong yagi kibong 75 kanga sashia kongshi aser ajak agi kibong 622 dak kongshia nisung aika nüngdakba makai lir, ta NPYF aser NPWF sangdong ajanga ashi.

Iba yongji NPYF aser NPWF lungjemmer aben süoshi, teyari oset aser nüngdakba jang o tzü lema agüja liasü.

Lendong timtem mapang nüburtem den nokdaktsü NPP tangatetba aliba temaitsü

agütsütsü, telungjem aser humanitarian service tanüla nung iba mapa inyak, ta ashi.

Iba mapang NPYF aser NPWF züngsem temi lendong ajuru aliba kibongtem den sensaksema parnok ajungmesoba o jembi aser maneni yaritsü shi.

Iba ama mapa ya angati yariba mapa kisüing masü saka timtem mapang külem nüburtem yaritsü mulungsentsü tangatetba lir, ta parnoki ashi.

PM Modi Jordan tonga ogo; King Abdullah II den senden amentsü



December 15, 2025 nü Amman nung tayimtsü anendak Jordan Ato kilonser Jafar Hassan-i Ato kilonser Narendra Modi agizükba sülen tangokba noksa nung angur.

New Delhi, Luchii/December 15 (Agencies): Hombarnü Ato kilonser Narendra Modi Jordan yimtiba, Amman tonga ogo; pai Ethiopia aser Oman linük nata semdangtsü.

Tayimtsü anendak Jordan Ato kilonser Jafar Hassan-i Modi agizüka liasü.

Jordan aser India na tsüngda tesendaktep yangluba sülen küm 75 ajungba mapang nung Modi-i iba linük semdangba ajanga tesendaktep ano tashi taitba akümtsü.

December 15-16 anogotem nung Modi-i semdangba mapang pai Jordan King Abdullah II ibn Al Hussein-a ajurutsü. Lenir anati linük ana tsüngda tesendaktep

asadangtsü aser region nung tongtiban onüktem nung tebilemba lemsateptsü.

Modi-i Jordan nung aliba India nungertema ajurutsü.

1947 küm India aser Jordan nati cooperation agreement agia liasü aser 1950 küm nung tesendaktep yanglu.

2018 küm King Abdullah II-i India semdanga liasü, 2015 küm taoba mapang India Tir Pranab Mukherjee-i Jordan semdang, 2018 küm Ato kilonser Modi-i Amman semdang aser 2020 küm National Security Adviser Ajit Doval-ia Jordan semdanga liasü.

Shishilembaba tsütsü Jordan atema India ya jenjang pezübuba nung lir. 2023-24 küm

nung India aser Jordan na tsüngda shishilembabaji dollar sen billion 2.875 liasü.

India aser Jordan na tsüngda külem project rongnung IFFCO-Jordan Phosphate Mines Company project aser Indo-Jordan Chemical Company densema lir.

India aser Jordan na tsüngda health, shisaliok, skill development, science & technology aser capacity building sectors nunga amalitepa inyaker.

Jordan semdangba sülen Modi-i December 16-17 anogotem nung Ethiopia semdangtsü aser December 17-18 anogotem nung Oman semdangtsü.

**Asür Rev. Waimerren (Chuchuyimlang) Menungra Bilemteter
16 Dec 2005 - 16 Dec 2025**

Obala Kibuba kidangi jar orr küm 20 abensaba anogo nung, pai toktsüba senmang - Tsüngrem den ochi nung ajemalua jajaba, temeim, tila akümba, item tsüngnep tali jangjashir aser iba ya onok taküm leniba ajok lir.

~ Temeim chirnur, semchir, anükapang aser kinungertem.

**GOVERNMENT OF NAGALAND
DIRECTORATE OF PRISONS
NAGALAND : KOHIMA**

NO.PRI/HQ/Ration-32/12 (Pt.II)

TENDER NOTICE

Sealed tenders are hereby invited for supply of Ration and Allied articles to various Jails in Nagaland for the Financial Year 2026-2027. The last date for submission of the tender forms will be on 30.01.2026. Tender documents will be opened on the same day at 12:00 Hrsat Prison Head Quarter.

Tender forms may be collected from the Office of the Prison Head Quarter from 12.01.2026 during Office hours on payment of Rs.1000/-

Sd/-
(RENCHAMO P. KIKON) IPS
Director General of Prison
Nagaland, Kohima

Supreme Court-i IndiGo dak sendakbakeno angadangtsü memelung

New Delhi, December 15 (Agencies): India nung IndiGo service noklang aika tayimtsü service noklang aika thinenba ken o nung tiyongtsüi aitsü atema Supreme Court nem public interest litigation (PIL) ka agütsü, ajisüaka SC-i iba temepishiba ken o angadangtsü memelung.

SC-i ken o benoker dang, iba ken oji Delhi High Court matsüngdang benokang, kechiyong High Court-i item ama ken o angadangdar, ta metetdaksü.

Chief Justice Surya Kant den Justice ana- Joymalya Bagchi aser Vipul M Pamcholi nungeri akümba bench-i, IndiGo dak sendakba ken o ka Delhi High Court-i angadangdar, ta shia ken o benoksang Narendra Mishra dang Delhi high court matsüngdang iba ken o

benokang, ta ashi. Bench-isa Mishra dang, nai benokba ken oji mebentetra tanaban Supreme Court dangi arutsü akok, ta metetdaksü.

IndiGo tayimtsü service thinenba aser tensa tamajungba dang küma passenger lakh aikati timtem ajuruba tebilemstü mebentettetba atema December 10 nü Delhi High Court-i Centre sorkar dang tasüngdangba kaogo.

Hombarnü ken o angadangba mapang nung IndiGo atema ken o jembitsür senior advocate Mukul Rohatgi-i Supreme Court dang, tayimtsü thinenba aser passenger temi timtem ajangshiba ajak asadangtsü atema Directorate General of Civil Aviation (DGCA)-i mongin committee ka tentetogo, ta metetdakja liasü.

Centre sorkari MGNREGA scheme melen G RAM G Bill benoktsü

New Delhi, Luchii/December 15 (Agencies): Centre sorkari Lok Sabha nung Viksit Bharat-Guarantee for Rozgar and Ajeevika Mission (Gramin) Bill, 2025 benoktsü aser iba ya agizükra iba Bill ajanga küm 20 dak tema aliba Mahatma Gandhi National Rural Employment Guarantee Act (MGNREGA) melentsü.

Iba Bill agizükra tang MGNREGA kübok yimtsüngtem nung anogo 100 tashi aayangtsü maongka agüja aliba nungi anogo 125 kümtsütsü.

Iba bill ya rural development aser Viksit Bharat 2047 vision na sendakteptsü nükjidong nung lir, ta Centre sorkari metetdaksüogo.

Iba Bill kübok rural public works ya Viksit Bharat National Rural Infrastructure Stack den adentsü. Asalentongtemji Viksit Gram Panchayat Plans kübok inyaksü aser itemji peipei tesem sasep nung asameyangtsü saka district, state aser national mechanisms den sendakteptsü, ta osang angazüker.

Iba bill kübok biometric authentication, GPS aser mobile-based monitoring, real-time dashboards aser proactive

public disclosures den külemi asalentong yanglutsü aser audit asütsü atema artificial intelligence amshitsü.

Item maparen achaayangtsü atema Central and State Grameen Rozgar Guarantee Councils tentetba den külemi national aser state-level steering committees alitsü. Iba programme ya centrally sponsored scheme ama inyaksü aser senotsüji Centre nungi shilem 60 aser state tem nungi shilem 40 (60:40 Centre-State funding ratio) asütsü, ajisüaka northeast state tem aser Himalayan state tem nungbo ratio ji Centre nungi shilem 90 aser state tem nungi shilem 10 dang asütsü. Ajisüaka legislatures maliba Union Territories atemabo senotsü ajakji Centre-i agütsütsü.

MGNREGA melentsü tebilemba aliba dak sendakba nung Centre sorkari, 2005 küm nungi tenzüka India yimtsüngtem nung temelenshi kanga adokogo; talisa gari lenmang tesendaktep, kiojen, electrification aser digital tsütsü kanga terenlok aliba den külemi kanga sensak tia kanga ajema kümogo; ibayongji yimtsüngtem nung terenlok atema inyakyim

tasen nüngdaker, ta metetdaksü.

MGNREGA melentsü atema bill tasen benoktsü aliba dak sendakba nung Congress MP Akhilesh Prasad Singh-i, "India sorkari puti otsü ajak melenshir," ta aitsü.

Congress lenir Tariq Anwar-ibo, "Iba ya kanga tia maka aser yimtenren nung ajemdaker inyakba lir. Parnoki Gandhi nungja ya sempar südi, ta bilemer. Iba telemtetba agiba ajanga Mahatma Gandhi aser pa tangatetba sülen anidakertem melung yirutsü," ta ashi.



Kolkata, December 15, 2025: Hombarnep Lok Bhavan nung West Bengal Angh, CV Ananda Bose-i Bangladesh Mukti Jodhas nungi züngsem ka nem tetushi agütsüdang tangokba noksa nung angur.



TIR YIMYIM YIMOBILEM (EDITRIAL)

DIMAPUR TUESDAY, DECEMBER (LUCHII) 16, 2025

Center-i mesükshiba state

India telongjem kübok aliba state-tem rongnung center government-i mashi-mashi ka amshiba state-ji Nagaland denbo Manipur asütsü südi. Atangji, Nagaland den medemdangdangbo Manipur-bo takar aser nüngtugu lima, kechiyong India -a tejak tentettsüsa asaya nung dang masü saka mapa inyakba tapu aika nung Manipur nungertemi tangar alima kintem ajateta takok angur. Ibaji dang masü saka Manipur nungbo BJP government-i yimsü süa liasü, ajisüaka center nung BJP government-i Manipur nung BJP government timtem nungi mekümzüktettsüsa akümbaji Manipur BJP telok asoshi dang masü saka center nung BJP government asoshi tamakok tuluka asütsü. Ashiko, Manipur nung tenla ki rongdokja apusoba jagi Manipur telongjemba aser tashi taitba akümtsü amai bilemer asütsüa akok, saka Imphal lenden nung Kuki Khristan-tem melitettsüsa aser tenemtsünglen Meetei nungertema melitettsüsa atalokba lendongji yimsü süpetba mapa ka asütsü. 2023 küm May 3 nü Imphal lenden nung Meetei nunger o Kuki nunger na tsüngda lendong tulu adoka kiojen dena rongdoktsüba agi talidak maka, pei ki toktsür government-i mesemtsüba "Relief camps" nung tang tashi alitsüsa akümbaji, Relief camp nung alirtem timtemba indangji Center government-i tashi shia mebilemtsüba aser Manipur state-ji state ka ama sükshia maliba sayur. Aji oda, joko amshia-amshia Manipur state ya akhi Manipur state to mesütettsüsa kümdagi, kechiyong Kuki nungertemi Imphal nung oagi mapa inyaka melitettsü, anungji parnoki joko Union Territory meshi tenzükgogo aser agütsütsüsa akümtsü. Ibaji center government-i tensa junga anepalu mesütet tamajung kümdaktsüba mapa ka asütsü. Atangji, state-bo tilaka ka dang asütsüa akok, saka Nagaland o Manipur state na prongla ya yimtenren nungbo alima tain lir, kechiyong Manipur ya India telongjem küboki maitdangyongi par chuba yimli kümteta yimsü süa aruba lima ka lir. Anungji, Manipur nunger ya tashitemetet nunga tangar India nungertem dang nungi tatsüngzükgba jenjang nung masü. Kasaji, Naga nungertema British nungertemi India aramoka yimsü asüba mapang, British nungertem dang Naga nunger yabo India nunger masü ta shitetba kin lir. Iba jagiang, alima tila aser kin-a tila süaka yimten nüchiso asoshi tasüa majem nokdakba kin ta alima kintemi meteta lir. Ibayongji, tanü tashi Naga yimten nüchiso angutsüba temeten indang jembir. Aji oda, center nung BJP government kümlibo Naga yimten tebilemtsü tatem küma latettsü atema mapang magitsü ta temulung lemlama jembir aser NSCN-IM telok denbo alima kintem ajak nem ngudakja aser angashidakja Naga yimten tebilemtsü tatem küma lateter ama sayua sangdong. Ajisüaka, tang tashi Naga yimten tebilemtsübo, akhi ama, melatetteti tepdaka lir. Alima tsüngdangbo Naga nunger meimer ama sayur saka Naga nunger mezüngmeshiba aser külaoktsüba mapaji ibai ka asütsü. Atangji, Naga yimten tebilemtsü latettsüba mapa ya temela masü, temela asübo Nehru-iang latettsür lila mesüra Narasimha Rao aser Manmohan Singh nungertemiang lateter lila. Ajisüaka, melamelaa latettsü ama sayua tangarbo aitsür saka peia makoker ta kümsülusü ken o melateti tepdaka yutsüba, Naga nunger reshikangshiba mapa ka asütsü. Joko, Naga yimten ken o ya election nung bangpetsa jembiba ken o dangbo masütsüla, saka ibai Naga nunger alima tsüngdang kin temeja kata ta sayuba mapa ka asütsüsa Naga nungertemi inyaktettsüla. Tang tashibo Naga yimten ken o ya Indian election nung amshitsü ayuba oset amai ka dang asenoki kümdaktsüogo. Election shia Naga yimten ken o tama süoktsü aser election temli telatetba kati arutsü amai jembia sayutsü, saka election tatem den külemi Naga yimten ken o a tama, joko election ka maru tashi 'camp' nung dang lidakja atatsü. Aji oda, joko Delhi nunga Naga yimten lenirtembo mesükshii kumogo. Kasaji, Manipur nungertema küma aoba angur. Joko, asenokbo Delhi-i kechi ashir ta masü saka Naga nungertemi kechi ashir ta asüba nung atemtsüsa inyakttsü mapang tongogo.

OLEMSABANG

TASÜR-SÜR TAMASÜR

~ P.Renthy Jamir

(Yashi adok nungi...)

- T. Temjen Toy IAS-** Aor Wabong tetemjen pa Nagaland government nung Department balala nung tokolak süa inyak ano Mokokchung nung Deputy Commissioner küm pezü pungo takok ngua inyak. Yamaji jenjang ka nungi ka ta temabai tua Chief Secretary menden nung amen. Pai pei lima nung D.C inyakba mapang nungi tenzüker pei nübur Aor meimtsü tejangraba tulu liasü. Anungji pa Chief Secretary inyakdang Aor lokti tentet ajak nung amalitepa teyari agütsüba Aori mamar. Aor-i pa memeteter Shinga mali. Saka teyanglur amsü nung tsük Aori memoa pa tetsüi asoba arishi onsara tatsü oda Tenüngsang ken züluri ashiba ama "Ajiang nai kü anogo aka piga kümdaktsüogo" ta atura mapang tom nung kua tamasüba limajagi ao.
- Imkong L. Imchen** - Aoer rongnung Soja asoba takutet politician pa ama tetemjen Wabong putu aika nunga mesoteter. Pa lanuwa nungi Aor lokti tentet AKM Ao Senden yamala ajak nung tokolak süa inyaka aru. Pa Ao kin Meimba nisung ta pai tenzükgba Wadang agi kuli asür, pa memeteterbo Aor shinga mali. Pa election nung kodanga temakok manguba nisung aser State nung Home minister tashi inyakba lenir Aor inti atema akhümdong sür lia aru. Pa Tsüngremer arishi kümsük nung masü saka pai benloker aliba koba Aor shinga temelenzüker mali iba khuret nemdaka yutsür onsara ajungbena shingaia maa ta ashitsü makokba tasübai jar ao. Aor tila tulu ajaki pa wadang tang atemtsü tabo pungmang nunga mepungmang, pai-a aji oda kasaji bilem. Anungji pai 5th Nov 2025 anogo osang zülurtemi Sir, na taruba 2028 Election nunga aitsü maitsü ta asüngdang "Why not... I will Contest" Kechiba ni taitso. Imchen confirms to contest next Assembly Elections. Saka anogo ishika sülen pa süogo ta angashidang Aor ajak ama-ali yima odaktsü ama bangkatep. Kechiyong Aor inti nükrangdong tenük masephsidang joko tanaben meyipa meshilangtsü yimkongjagi oa adok.

Kechiyong pa nübu asenoki teyanglusang den rakteptsü makok. Yamaji Aor takutet Walunir taküm jenti asenoki apayuseta akümlir toktsür aobatem rongnung yangi kar agiteta tatishitsü amshir. Aser nüburtemi parnoki Aor atema inyakba mapa tajung kodanga mamar, aser Aor puti otsü küma züngshir.

TAMASÜR-Meimchir kechi koda tereprangtsü balala yamaji kar arishi tatsü kar arishi talang, kar taso shizüka khen lir yakta arishi atemer karbo khen alidangjia taso meshizuki timtemseta lir taküm tembanger karbo tasoshizüka arishi anogo tangar dang talangba temjena alir. Kechiyong arishi yabo Teyanglur kabu nung lir. Davidi ashiba ama "Nai kümji ne ajungba agi temdaktsür". Yangi Aor shirnoki Aor ajaki meteta nübur asoshi mapa tajung jenti inyakttsü aser tanü tashi pei temeim kinungtsü dena Tsüngremi arishi moaja taküm ali, aika rongnungi tatishitsü kar yangi zülur.

Kechiaser kinungtsü melira kibong tabensa masü. Alexander Pope-i ya shia lir "Kinungtsü kaji kotaker tesüngmangtsü sempet" Item nisungtem ya ajaki meteta ali nung parnoki mapa tajung inyakba yangi mezülutsür.

Lanu Toy- Taoba Chief Engineer Power Department pa Tsüngremi tangar kabu nungi kümsüka ayuba tanü tashi temeim kinungtsü teneaprongla arishi moatsüba asoshi nübur ajaki arishi meshija Sarasademtsür.

Prof Talitsüba- Retired Director School Education pa temeim kinungtsü tena prongla tang tashi medemer ajak sümar Tsüngremi taküm tajung wazüka yutsüba asoshi ano arishi talangba moajang ta nüburtemi Sarasademtsür.

S.C. Jamir- Pa Tsüngremi asaa Aor atema injang bomb maintsür kümsüka ayuba, pa otsü kakat nung azünger asünung ajaki meteta lir. Temeim kinungtsü tenaprongla arishi talang Tsüngremi moatsüba asoshi Aor tulu tila ajaki arishi meshija maneni Sarasademtsür.

Rev. Dr Imo Aier- Pa Aor rongnung takutet Tsüngrem osang abener America lima tashi oa Missionary inyaker ano kinungtsü tena prongla arshia taküm junga lir ta angashidang nübur ajaki arishi meshitsür.

T. Tongpang Ao- Taoba PWD Chief Engineer, Secretary Aor pa ama nübu tajung ka tang tashi temeim kinungtsü tenaprongla taküm tajung temjena arshia aliba ya nüburi moa. Anungji nüburtemi arishi meshija Sarasademer.

Rev. Süzütemjen- Pa ama Tsüngrem tenzükgba wadang nung ochishia noktaker inyaka aruba tanü tashi pai nübur melenshitsü ocet züluba osang kakattem nung angudong temulung pelar.

Aser nübur ajaki temeim kinungtsü tena atama arishi meshija Sarasademtsür. Kechiba parnok ya arishirtem ta zülur ta süra kar küm 93/94 Karbo joko küm 96/97 ta alibatem (tukur temapur) Habaku kakat nung "Ochishir pei tamang agi alir" to shia lir, ano C.Leo Tolstoyi "Shirnoki tajung inyaker parnokji taküm alir" ta ashir. Anungji Aor lanur tarutsü putu nüktang shirnoki asen lima anitsüba lir item tsurabur tamasürtem dang ya lesson tajung angazükdi kechiaser meimchir arishi teyanglusang kabu nung lir, pai tatsü kümdaktsür pai talang kümdaktsür. Aser asüng kechi ataloktsü aseni memetet. Apijemtsü shin kakat züluri ashir "Kechiyong anogoi kechi bener arutsü nai memtet". Anungji Yakob kakat nung ashiba ama asenoki ya ashitsü mamatokli "Kibubai mulungra onoki taküm lia mapa ya mesüra aji inyakttsü" ta Tsüngrem meshia jembitsü merangdi. Aser asen Aor lenirtem Tasür-sür Tamasür shirnok lir parnok ajak arishi Yihusua aser Kaleb ama langa lidakjang ta Sarasademtsüdi ta ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Rünguzumi Baptist Church Women Dept. kùm 75 Jubilee among



December 14, 2025 nü Phek District kübok Rünguzumi yimdak Rünguzumi Baptist Church (RBC) Women Department kùm 75 ajungba Jubilee mong sentong nung telok kati ken atendang tangokba noksa nung angur.

Kohima, Luchii/December 15 (TYO): Rünguzumi Baptist Church (RBC) Women Department aser Rünguzumi Combine Mothers' Fellowship nati senteper RBC Women Dept. kùm 75 ajungba Jubilee mong sentong December 13-14 anogotem nung Phek District kübok Rünguzumi yimdak ayongzüka agiogo.

Jubilee sentong nung tongti o jembirji Chakhesang Baptist Church Council (CBCC) Women Secretary, Neingupe-ü K. Rhakho liasü. Lai Jubilee omen "Rooted in Faith & Growing in Love" (Efesa 3:17) nung ajemdaker Tsüngremer yimlibilem aser Tsüngremi ajungba bilemteta jembi.

Laisa, akhidang yimdak lenirtem tamang ajanga tamendakdak junga

yangertsüba ajanga tanü tashi len anir, ta metetdaksü.

Rom 10:17 nung ajemdaker lai, Khristan taküm ka tamendakdakji Tsüngrem O nung tera-yanga aliba lir aser ibaji ajanga shirangdang, tatidang ajurudang, tamakok ajurudang aser tasü mapang atongdanga teimla aser tashi agütsür, ta ashi.

Laisa, meimchirtem nem tekümtet agütsütsü asoshi Yisu Khrista Kngki nung metaba ajanga Tsüngrem temeim jungkai adoktsür, ta ashi.

Laisa tetsürtem aser tsüraburtem dang tanurtem lenla ajak nung junga anitetsü atema tongtibangsüa inyaktüsü; yi aser moko nungi jenbua alitsü ayongzüka den külemi tanurtem nem smart phone kanga mamshidaktsütsü

metetdaksü.

Laisa tsüraburtem dang, lanuwa asüandang nungi tanurtem sarasadem aser Lai tesayuba nung anitetsü ajungshia liasü.

Lai lokti dang Tsüngrem nem tanaben asentenshir taküm bendanga agütsütsü aser Tsüngremer mission wadang inyakba ajanga tanela jenjang asüngsashitsü ayongzü.

Kasa sentong nung o jembirtem rongnung Dukhrülü Lohe, (Retd) Joint Director RD aser Vezovolü Vero, secretary, Women Department, CBCMH Kohima na liasü.

Anogo ananü Jubilee mong sentong nung Kohima, Dimapur, Phek, Chozuba aser Rünguzu Nasa units nungi tetsürtem aden.

ANOGO ABEN TSÜNGREM DEN

Meimlaba temoatsütem

Kibuba nü Tsüngrem ola nenoki angadi süra, item temoatsütem ajak meimlai nenok dangi arutsü.

Tazüngkonem- 28:2.

Kodang na Tsüngrem den longjema jajadir, nai Pa dang moajang ta asüngdangtsü menüngdaker, kechiyong nai Pa dang tashi angaba ajanga Pai na moatsünüa dang alir. Nai meimba tembar kar nüm meimlai alidang pela-a süngmangdaksütsusa sempet agütsüba ama, Tsüngremi na moatsünür. Nai dang tashi angara, anüpdang yaka meimlai alidang telephone ajanga osang tajung kar angashi ama mesüra nükongtsütsü jogola ania-belemer alidang shiti tajung ka arua atong ama, Tsüngremi ajungbena na moatsür. Kodang nai Kibuba den tashi anga jajadir, nai meshiaka-memeshiaka Pai nü nüm temoatsütemji magütsüiang malitsü. Tsüngrem dang tashi anga, Pa den longjema aliba agi na dang masü, saka nür chirnor aser semchirsemnor tashi Pai moatsütsü. Solomon kanga takar akümbaji tanga kecha agia masü saka tebu David-i Tsüngrem den tashi anga jajaba agi liasü. Pai tashi angaba ajanga Tsüngremi Abraham ya alima kintem ajak tebu asütsüsa moatsü. Nai Tsüngrem nungi anguba sempetji zübazüba tagizük, kodang nai meimlaba temoatsü angur, Tsüngrem nüm tenüngsang agütsütsü tamadok aser ano maneni meimlaba temoatsütem angutsü asoshi renema liang.

US Commission on Intl' Religious Freedom nung Rachel Laser shim



Rachel Laser

December 15, 2025: Americans United for Separation of Church & State nung Tir aser CEO, Rachel Laser United States Commission on International Religious Freedom (USCIRF) nung commissioner shimogo; Senator. Chuck Schumer-i la commission süja liasü.

Brihostibarnü Rachel Laser-i sangdong ka ajanga, "Alima tesem balala nung tamangba yimsü temeden atema inyaktüsü asoshi kü nem maongka agütsüba atema ni Senator Schumer dang pelar," ta lemsatep.

Laisa, "Americans United for Separation of Church & State nung lenir ka ama asen linük temzüng ajanga Arogo aser yimten na piladaksüba ya ni pusemer. Iba jung ajanga

nisung ajak temeden kümzüka ayur aser pei melungba yimsü amanga benshitsü atema temeden agütsür," ta metetdaksü.

"Americans United mission ya US temzüng nung amendaka lir, aser ozü organization-i linük nung rangloker inyaker. Ajisüaka tang ni U.S. Commission on International Religious Freedom nung adenba ajanga ni kü tashi yari linük nung dang masü saka alima tesem ajaklen tamangba yimsü temeden ajungkettsütsü atema inyaktüsü," ta lai metetdaksü.

Rachel Laser ya Yihuda tsür lir. "Yimsü alia amangertem inyaksangshi aser yimsü temeden kümzüksü atema inyakba maparen nung sorkar yaritsü atema maongka anguba

ya ni asoshi maongka lir," ta lai ashi.

USCIRF Chair, Vicky Hartzler-ia USCIRF nung Laser shimba atema pelaba lemsatep.

Hartzler-i, "Alima tesem balala nung yimsü temeden anema inyakba ajanga reshikangshi ajangshirtem atema raratsüba tongbang nung nisung kwika aniokdir; yamaji tajungba dang," ta metetdaksü.

"Alima tesem balala nung yimsü temeden anema inyakba ajanga reshikangshi ajangshirtem atema raratsüba tongbang nung Rachel Laser den külemi inyaksemtüsü yongyaa atar," ta Hartzler-i metetdaksü.

2018 küm Rachel Laser ya Americans United nung Executive Director shima liasü. 1948 küm iba organization tenzüka sülen iba telok nung tongtiji Khristantem dang liasü, saka tangbo tongtiji Yihuda tsür Laser lir.

Tamalen Laser ya NARAL Pro-Choice America, National Women's Law Center, Third Way aser Religious Action Center of Reform Judaism nunga inyaka liasü.

USCIRF nung commissioners ya Tir mesüra Congress nungi lenir mashie kati shimtsü akok.

Nicaragua-i par linük telungi Laishiba bener aittsü memelar

December 15, 2025: Nicaragua linük semdang bendangertemi joko Laishiba bener arutsü makok; Laishiba dang masü saka kaketter mesüra electronic osettem-a bener arutsü makok.

Iba linük nung sensotem temeden aika nokdangba aser Khristantem anema inyakba mapang ka nung maneni item tenokdangba benoker.

Costa Rica nung aliba Tica Bus terminals nung notice board ajanga bendangertem dang, Nicaragua telungi Laishiba, osangkaketter, magazines, kaketer, drones aser cameras bener maittsü metetdakja lir, ta Christian Solidarity Worldwide (CSW)-i metetdaksü.

El Salvador nung aliba regional transport company Tica Bus nung inyaker kati, Managua-i aoba passenger tem ket nung Laishiba, osang kaketter, magazines, kaketer, drones aser cameras memelar, ta metetdaksü.

Nicaragua linük nung civil society telok meyrjang aika anentsüogo, aser item telok rongnung Khristan melungtet teloka aika densema lir.

2018 küm April ita nungi

tenzüka civil society organizations 5,000 dak tali anentsüogo aser item rongnung yimsü dak sendakba organization 1,300 densema lir.

Iba linük nung Arogoibo odiodia Tir Daniel Ortega-i aniba sorkar aitsür. 2018 küm sorkar anema longkak aitha mapang nunga Protestant pastor Palacios Vargas densema Khristan lenirtema aikati shilem agia liasü. Pastor Vargas ya La Roca de Nicaragua Church Association tentetsang lir. 2019 küm sorkari iba Association-a anentsüogo.

Taküm March ita nung U.N report ka ajanga, Ortega-i aniba sorkari democracy anema inyaker, meimchir temeden aser yimsü temeden anema inyaker, ta metetdakja liasü.

Yaküm CSW-i report ka ajanga, Nicaragua nung yimsü dak sendakba anema inyakba tatalokba 222 lir aser 2024 küm yimsü lenir 46 puogo, ta metetdakja liasü.

CSW director of Advocacy, Anna Lee Stangl-i, yimsü dak sendakba kaketter nokdangba ya agientsüla aser yimsü temeden agütsütsüla, ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tsümgmen**

(adj) lendong ataloktsü amai sayuba (bad omen)

Aremi aotsü lia tsümgmen majung sayuba agi mao athi.

Tsümgminak

(n) mi apuba agi tsümgden aser tsümgbang tanak kümdaktsüba (soot)

* Tanü asümgbo kidang mi mapuba agi tsümgminak matur.



Tir Yimyim

OLONG PAITEP # 7361

1		2			3		4		5
				6		7			
8									
					9				
		10							
11									12
				13			14		
15									
16							17		

TIPIEN

1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anümgdang masü - (5)
14. Jabaso masü - (4)

OLONG PAITEP # 7360 TELANGZÜBA**TIPIEN :**

1. Tesangra, 5. Mungo,
7. Kisen, 8. Salem, 12. Semki,
14. Kilem, 15. Kensü,
16. Sangpang.

LANGTSÜNGLEN :

1. Temesen, 2. Raksa, 3. Aon,
4. Aso, 6. Nile, 9. Alizümg,
10. Omen, 11. Lemta, 13. Ola,
14. Kin.

NAI-A YA METETTER

Tata Sierra ajanga NATRAX nung ghonda 12 tendangdang 29.9 kmpl fuel efficiency otsü tasen ka yanglutetogo. Iba ajanga Tata ajanga Hyperion petrol engine tasen yangluba sayuogo aser India Book of Records nung zülüok.

Indore nung NATRAX proving ground nung ghonda 12 tendangdang Tata Sierra SUV ajanga 29.9 kmpl senzüteta liasü aser iba ya Pixel Motion team ajanga tendanga liasü.

Pixel Motion team-i anepdang 7:00 ako nungi aonung 7:00 ako tashi Tata Sierra SUV khi danga maneni anir senzüa tendanga liasü.

Iba gari nung Tata indang 1.5-litre Hyperion petrol engine mezümgbuba enoka lir.

Assam nungi Sangeeta Baruah Pisharoty-i PCI president inyaker

Guwahati, December 15, 2025 (Agencies): Press Club of India (PCI)-i December 13, 2025 nü parnok Tir inyaktsü atema Assam nungi senior journalist Sangeeta Barooah Pisharoty shimogo. PCI tenteter tang mezümg atema tetsür ka tir inyaktsü shimogo.

PCI election nung Pisharoty-i aniba panel ajanga office-bearer aser managing committee menden ajak nung takok angu. Lar teloki 21-0 margin agi takok tulu nguteta liasü.

Pisharoty-i 1,019 votes angu

aser iba ya la den tokteper Atul Mishra (129 votes) aser Arun Sharma (89 votes) den kanga agi teimba lir.

Secretary-General atema election nunga Afzal Imam-i 948 votes ngua Gyan Prakash (290 votes) madak takok tulu angu.

Maneni, Jatin Gandhi-i vice-president, Aditi Rajput-i treasurer aser P.R. Sunil-i joint secretary takoktem nguogo.

PCI chief election commissioner, M.M.C. Sharma den par teloki election agiba osang metetdakja liasü.

PCI Tir menden toktsür Gautam Lahiri-i club zümgsem ajak dang temulung lema anidakba atema pelaba metetdaktsü. Paisa telok tasenba dak tamang akaba aser parnoki reju tashitaitba küma anir aotsü ta ashi.

Secretary-General menden nungi anener Neeraj Thakur-ia tang mezümg atema tetsür tir ka shimba ya alizümg tongtipang ka atongba lir aser Press Club of India ajanga maneni equality, diversity, aser democratic values atema inyaktsü nangzükshir ta ashi.

Mizoram Congress-i MNF toktsür ZPM den lokteper

Aizawl, December 15, 2025 (Agencies): Mizoram Congress-i Hokolbarnü Mizo National Front (MNF) den pre-poll alliance anenogo aser Zoram People's Movement (ZPM) den loktepogo.

Lai Autonomous District Council nung sorkar akümtsü nükjidong nung iba mapa inyakogo.

"MNF-i takok ngur aliba council members aika mesüzüktsü merangogo aser iba ya pre-poll agreement anema lir" ta Lawngtlai District Congress Committee president J Ropianga Chinzah-i ashi.

"MNF lenisüba ajanga ZPM nungi T Zakunga nem chief executive member mapa agütsütsü ta shia mesüzük" ta Chinzah-i ashi.

"Party ana tsümgda pre-poll agreement nung hung assembly

tia ka ajurura coalition government atema jembiteptsü lateta lir" ta MLA aser Mizoram Pradesh Congress Committee (MPCC) vice president C Ngunlianchnunga-ia ashi.

December 3 elections nü Lai Autonomous District Council atema election nung MNF-i menden 8 nguteta single largest party aküm, parnok sülen Indian National Congress-i menden 7 nung takok angu.

Iba election nung Bharatiya Janata Party (BJP)-i menden 2 aser independent 2-i takok angu.

Ajisüaka, MNF vice president aser Mizoram Legislative Assembly opposition leader Lalchhandama Ralte-ibo Congress-i ashibaji tiyazü ta shiogo.

"Taoba Lai district council elections nung ozü party-i

menden 25 nungi 20 nung takok angu. Nübertemi ZPM kanga meyariba kuli angur aser tawa parnoki Congress den loktepba ya sorkar akümtsü atema dang lir ama ajiteter" ta Ralte-isa ashi.

Congress aser ZPM ajanga teloktep sorkar akümtsü sayuogo ajisüaka parnok ano ka makümdang yongi power-sharing atema mangatettep adokogo ta Ralte-isa shisem.

Mizoram nung 1972 küm Sixth Schedule autonomous councils asem akümba rongnung Lai Autonomous District Council ya ka lir. Iba dak alia Chakma aser Mara council tem lir.

Iba council ya Lai nunger asoshi self-governing body ka lir aser local administration, sobaliba ozümg, ali ketdangsüba aser terenlok maparen acha-ayanger.

Assam police-i opium seret 86 den nisung 7 apu

Guwahati, December 15, 2025 (Agencies): Assam police-i December 14 nü Kamrup district nung opium seret 86 puogo aser iba dak sendakba nung nisung 7 pua lir.

Osang tejangja angazükba sülen police-i Udiana village

nung ki ka mita aodang opium nguteta liasü. Iba dak sendakba nung apurtem rongnung ki kibur dena lir aser pa ya taoba nunga kasa drug ken o dak sendakba nung puogo ta police-i ashi.

Police-i mita aodang Rs 25,400 aser electronic weighing machine ka nguteta liasü. Iba

ajanga drug ayuba aser ayokba kuli agütsür.

Parnok nisung tenetprong anema Narcotic Drugs and Psychotropic Substances (NDPS) Act kübok ken o benokogo aser maneni bushisümgdang südar ta police ketdangsür kati ashi.

Manipur nung lanurtemi Loktak Lake merüktet

Imphal, December 15, 2025 (Agencies): Manipur kübok Bishnupur district nung December 14 nü lanurtemi anir Loktak Lake merükteta mungogo.

Iba ajanga lanurtemi lipoküm küzmüka ayutsü aser government agencies o sendaktepa alirtem yaritepa

aotsü tenangzükba aliba sayur. Tanü lanurtem ghonda asem tashi Loktak Lake merüktetdang tzükümtem nungi plastic waste aser garbage truck gari ana tashi bendena liasü.

Iba mapa ya National Youth Climate Consortium-i DESAM aser Moirang Municipal

Council den yaritepa ayongzük aser volunteers 40 temai yaritep.

Loktak Lake tzükümtem nungi plastic aser non-biodegradable waste aika bendentetogo. Ajisüaka iba mapa ya khi dang masü saka teti inyaktsü nümgdaker ta tayongertemi ashi.



IMKONGMEREN LONGKUMER

TENÜNGSANG ASER TEPELA MULUNGJANG NUNGI NÜ DEN NA TASOBA KÜM 80 AJUNGBA TEPELA LEMSATEPER. KIBONG ASOSHI TASÜ TAIT MULUNGSENTSÜ, SHISA TAKA, TAMANG, ARIABLEM ASER TEMEIM NUNG KÜM 80 JANGRATEMALIOGO. TSÜNGREMI ANEMA ALIBA, TESUNEP ASER TEPELA TAKUM MOAJANG, ASER PA TAOCHI AGI NA MANENI LEN ANIANG.

Temeim Kinungtsü, Jabasotem, Jabaso Kinungtsütem aser Semchirtem.

AO SENSO TELONGJEM MEDZIPHEMA

Medziphema, Nagaland - 797106
Golden Jubilee Planning cum
Fund Raise Committee

PELASHISHIA JAOKER

Ao Senso Telongjem Medziphema Küm Tenem ajungba benjungmung 19th December 2025 anogo nung amongtsü sentong renema lir. Anungji tesüiba mapangtem nung iba Telongjem nung züngsemsüa lidanger aoertem ajak iba sentong nung arua adentsü pelashishia jaoker. Iba sangdong dak alaka nenok dangi sentong balaka meyoker.

Sd/-
Wb. OPANG JAMIR
Tir, ASTM

Sd/-
Wb. SAMA IMSONG
Convenor
Golden Jubilee Planning Committee

Far-right candidate Jose Antonio-i Chile tir election kokogo

Santiago, Luchii/December 15 (Agencies): Far-right candidate Jose Antonio Kast-i tir election koka pa Chile tir 38buba kümogo. Par party-i centre-left sorkar atsüngtokogo. Deobarnü pai vote shilem 58 agi election kokogo. Pai taoba Labour Minister Jeannette Jara tsükdaktsü, shiba Communist Party yimden yimsüsür ka aser tang linük yimsüsüa aliba centre-left coalition tenüng nung nokdaka liasü. Jara aser lai aniba coalition, Unity for Chile-i polls shibangba sülen parnoki tamakok anguba agizükogo. "Democracy-i kanga jangja jangja jembiogo. Ni tang President-elect [Kast] den jembia Chile ajungtsü atema takok ngua inyakyonga aotsü

imlaja ataba lemsatepogo," ta Jara-i social media nung zülutsü. Kasa mapang nung election akokba sülen jembiba mapang election akokba ya pa indang political onüktem benoka inyaktsü atema temelaba anguba lir, ta Kast-i ashi. "Iba ya jurila takok ka masü mesüra party takok ka masü. Chile-i takok nguogo aser joko tetsübu nung malitsü timla lir," ta pai sentepa aliba lokti dang ashi. Argentina aser Ecuador amala linük tem nung right-wing lenirtemi takok anguba sülen tang Chile nunga right-wing party-i takok nguogo. Republican Party lenir arishi küm 59 tain Kast ya tang agi tasembenbuba tir atema election nung toktepogo aser

taküumang takok ngutetogo. 2021 küm election nung pa taoba tir Gabriel Boric-i tsükdakja liasü. Boric-i iba election ya point 10 margin agi koka liasü. Public opinion polls nung voter temi tawa azütokshi lendong tali akümba aser immigration ken o den Chile rongsenketzüng mejungi akümba agi tezü adangba lemsatepa liasü. Election atema nüboyimba mapang Kast-i temelenshi bener arutsü nangzükogo. Pai, ozüng alema inyaksangshirtem anema jenjang agitsü aser immigration dak sendakba nung US tir Trump-i jenjang agiba ama paia ozüng alema linüki arur alirtem meyipa yoktsü tenangzükba agüja liasü.

Morocco tzümetsüng lendong nung nisung 37 asü

Rabat, Luchii/December 15 (Agencies): Morocco kübok Atlantic tzüküm nung aliba Safi province nung tzünglu kanga sashia aruba ajanga tzümetsüng adokdaksüba sülen nisung 37 süogo, ta ketdangsürtemi metetdaksü. State meyong broadcaster SNRT News-i Hombarnü sangdong ka ajanga ashiba agi, Deobarnü ajunebena iba lendong atalokba sülen nisung 14 mozükidang temang anepaluogo, kong ana intensive care unit-i anir aoba densema lir. Social media nung noksa balala ajanga Safi jila nung lishi tzü agi lenmang nung gari aser jana bendenba bongdangtem aponger aoba nguogo. Iba jila ya linük yimtiba Rabat nungi km 300 shi pilar lir. Tzünglu ghonda ka shi dang kanga sashia aruba sülen yimti nung ki aser dokan 70 shi metsünga

liasü, ta ketdangsürtemi ashi. Safi governorate-i sangdong ka ajanga ashiba agi, tekümsükba maparen maneni inyakdar aser tzümgtsüng agi kongshir aliba tesemtem kümzüka toktsütsü aser iba tesem nung alirtem nem teyari agütsütsü atema tenügdakba jenjang balala agidar. Lenmang raksaba sülen lenmang aika nung gari senzüsenpong asü mejungi kümogo. Casablanca nung amendaker aliba osang kaket Le Matin-i ashiba agi, Safi aser Hrara na sendaktepba lenmang kanga mejungi kongshiogo. Osang kaket ajangsa Safi nung national education indang provincial directorate-i Hombarnü school ajak shibangja liasü. Deobarnü nikongtsütsü tashi nungbo tzü asemshiaogo, saka tzü agi metsüngba kitem

jenjang kanga mejungi lir. Tekümsükertemi maneni bushisügdanga aoba mapang weather service forecast-i Mongolbarnüa linük ajunga nung tzünglu kanga sashia arutsü ta takzütsüogo. Küm tenet tsüngsarusa nung aruba sülen Morocco nung tang tzünglu kanga sashia arudar aser Atlas tenem nunga rürjeb ladar. Linük General Directorate of Meteorology-i ashiba agi, 2024 küm ya Morocco asoshi tatsüktiba küm liasü. 2021 küm tzünglu kanga sashia aruba sülen nisung 24 asü aser 2014 aser 2015 na nunga tzünglu kanga aruba ajanga Morocco kübok tesem balala metsünga liasü. Morocco kübok Fes yimti nung taoba hopta ki ana chirepa nisung 19 asüba sülen Deobarnü iba tzümetsüng lendong ya atalokogo.

Office of the
Waromung Laishir Telongjem
TEPELA SANGDONGER



Dr. Chubayula Longkumer



Miss. Sashikumla Longkumer

Senate of Serampore (University) Convocation, Nov. 27, 2025, Serampore, West Bengal nung alidang Waromung Laishir nungi züngsem tajung anati takok tajung anguba tepela yamai lemsateper:

1. **Mrs. Chubayula Longkumer-i** (D/o Lt. Limawapang Longkumer & Nungshisangla Ozüküm) (Waromung) The United Theological College, Bangalore, Department of Christian Ministry: Pastoral Care and Counselling nung Doctor of Theology (D.Th) ngutetogo. La thesis title: "Coping Patterns and Wellbeing Among Young Adults in Single-Mother Families in Selected Districts of Nagaland: Implications for Pastoral Care and Counselling".
 2. **Miss. Sashikumla Longkumer-i** (D/o. Mr. James Longkumer & Burtola Aier) Award ana angu -
(i) Late Dr. C. Devasahayam Prize for Christian Ministry (M.Th)
(ii) C.S.I. Diocese of Madras Prize in Christian Ministry (M.Th)
- Waromung Laishir Telongjem-i Dr. Chubayula Longkumer aser Miss. Sashikumla Longkumer tena nem tenügsang aser tetushi Tsüngrem sentsüwangshi asoshi agütsür aser Tsüngremer wadang tuluba inyaktsü asoshi sarasademsür. Tsüngremer-i tena taküm Pa wadang asoshi maneni moajangma.

Sd/-
Dr. Tinumeren Ozukum
President
Waromung Laishir Telongjem

Sd/-
Mr. Shilu Aier
General Secretary
Waromung Laishir Telongjem

MENUNG RAR



Pastor **MERANGSOBA (SÜNGRATSÜ)** sür küm tenem ajongba bilemteta amonger.

TUESDAY 16TH DEC 1975 - TUESDAY 16TH DEC 2025

"Chirnur, Semchir aser na meteter ajaki tanü na aser nü mapa bilemteter"

"Kechisarina tejen akümer, Tenüng tajung kodanga tejen makümer."

~ Chirnur, Semchir aser Anükapang.

ALI TAYOKTSÜ LIR

Residential land any size available @450 per sq.ft. Situated at Signal Angami and Thahekh boundary. 5 minutes walk from Livingstone School, next to St. Vincent Angel Home and CM father's Seminary. No land filling required. Plot ready for building directly. Approach road from both Signal Angami and Thahekh.

Ph. No. 9089970912
9233794855

70	(6)	122	46	78	95
(5)	(5)	127	55	73	(8)
(4)	119	64	38	TO	118
(3)	117	55	65	(9)	118
(2)	115	60	65	115	65
X	60	72	(1)	(10)	(11)
60	72	60	60	TO SIGNAL ANGAMI	60
SOLD	50	SOLD	67	(12)	60
40	40	40	60	(13)	60
			60	(14)	SOLD
			40	40	

Shafali Verma nem ICC Player of the Month naroküm agütsü



Luchii/December 15, 2025

(Agencies): India tetsür team opener Shafali Verma-i taoba ita South Africa den tetsür World Cup final asayaba mapang kanga junga asayaba sülen la nem November ita atema ICC Women's Player of the Month naroküm agütsüogo.

Shafali ya Pratika Rawal melen semifinal nungiang asaya-a tenzük, aser lai la nem agütsüba maongka kanga junga agizüka liasü. Navi Mumbai nung final asayaba mapang Shafali-i ball 78 nung run 87 yanglu aser India team-i asayar 7 out sür run 298 yangluba nung

teyari tulu agüja liasü. India team-i iba asaya ya run 52 agi koka mezügbuba World Cup koka liasü.

Shafali aser Smriti Mandhana na senteper run 104 yanglua India tema jenjang kanga junga tokja liasü. Pressure agi sünger aliba final asaya ka nung lai la arishi küm den meputep kanga süngjemshir asaya-a team asoshi tongtibang shilem agia liasü.

India nung opener yagi iba naroküm atema Thailand tsür Thipatcha Putthawong aser UAE tsür Esha Oza na ajateta liasü.

"Kü atema mezügbuba ICC Women's Cricket World Cup ya ni imlaba ama masü saka iba dang nungi kanga agi tajungba tembangogo. Final nung team takok asoshi ni teyari agütsüetba atema aser kidang tang mezügbuba World Cup koka otsü tasen ka yangluba nung densemba atema kanga pelar," ta Shafali-i ashi.

"Kü nem November ita atema Women's Player of the Month naroküm agütsüba atema kanga pelar. Ni iba naroküm ya kü teammate, coach, kibong aser tang tashi nung ni nongita yaritem nem bendanga agütsür. Team ka ama onok takok aser tamakok ajak angur aser yamaji naroküma kasadang," ta lai shisem.

Teburtem rongnung South Africa nung spinner Simon Harmer-i ICC Player of the Month award agizükogo. India den Test kanga junga asayaba sülen pai iba naroküm agizükogo.

Harmer-i Bangladesh nung Taijul Islam aser Pakistan nung all-rounder Mohammad Nawaz na ajateta liasü. South Africa team-i küm 25 sülen India nung mezügbuba Test asayamung ka akokba nung pai tongtibang shilem agia liasü.

Arishi küm 36 asayar yagi iba asayamung nung wicket 17 agi aser pa indang average 8.94 liasü.

Africa Cup of Nations 2025 Deobarnü tenzüktsü

Luchii/December 15, 2025

(Agencies): Africa Cup of Nations koba dang AFCON ta ajar iba asayamung ya taküm Morocco nung asayatsü. Asayamung nung mezügbuba asaya Deobarnü linük yimtiba Rabat nung asayatsü.

Hopta pezü asayatsü aliba iba asayamung nung mezügbuba asaya ya asayamung ayongzüka asayaba linük Morocco aser Comoros na asayatsü.

Final asaya ya January 18 nü Rabat nung 69,500-capacity Prince Moulay Abdellah Stadium nung asayatsü renema lir.

Iba continental asayamung atema yimti trok nung venue teku shima lir.

Asayamung nung shilem agisü aliba team 24 ya telok trok küma lemsar lir aser ajak senteper asaya 68 asayatsü. Group stage ya December 31 nü tashi asayatsü aser knockout stage ya January 3 nü tenzüktsü.

Team aser telok

Group A: Morocco, Mali,

Zambia, Comoros

Group B: Egypt, South Africa, Angola, Zimbabwe

Group C: Nigeria, Tunisia, Uganda, Tanzania

Group D: Senegal, DR Congo, Benin, Botswana

Group E: Algeria, Burkina Faso, Equatorial Guinea, Sudan

Group F: Ivory Coast, Cameroon, Gabon, Mozambique

Telok ajak nungi temaba jenjang nung tembangba team ana den tasembuba jenjang nung tembangba team tajungtiba pezü knockout stage-i ia round of 16 asayatsü. Iba sülen quarterfinals, semifinals aser final asayatsü. Maneni semifinal nung tamakok anguba team ana tasembuba jenjang atema tokteptsü.

Knockout asaya nung atakzüktsür aliba mapang tashi nung team tem draw süra mapang talila minute 30 apuloktsür asayatsü aser takoker bendangtsü atema nüngdak dang süra penalty asayatsü.

Jay Shah-i Messi nem T20 World Cup ticket agütsü



Luchii/December 15, 2025

(Agencies): December 15 nü New Delhi kübok Arun Jaitley Stadium nung sentong pongububa agiba sülen Lionel Messi-i India semdangba sentong tembangogo.

Hombarnü Argentina nung nungntugu football asayar den Inter Miami teammate Luis Suarez aser Rodrigo de Paul nati iba sentong nung shilem agi, kong International Cricket Council (ICC) mendenbuba Jay Shah, Delhi Chief Minister Rekha Gupta, aser Delhi District and Cricket Association (DDCA) tir Rohan Jaitley nungera dena liasü.

Sentong nung Shah-i Messi nem 2026 T20 World Cup nung India aser United States of America (USA) na asaya indang ticket ka agütsü. Iba asaya ya asayamung tenzükba nü (February 7) Wankhede Stadium, Mumbai nung asayatsü.

Temetettsü kaji Messi ya tang USA kübok Major League Soccer (MLS) nung Miami

nung amendaker aliba club nungi asayar.

Shah-isa, Messi nem bat ka agütsü, kong nungntugu cricket asayartemi sign sür liasü. Paisa, Messi, Suarez aser Rodrigo nung nem India team indang T20 jerseys tasemba kaka agütsüogo. Messi indang jersey nung number 10, Suarez indang nung 9 aser Rodrigo indang nung 7 keta liasü.

Messi-i stadium longa senzuba sülen souvenir ama sentepa aliba fan tem nem ball kar agütsü. Iba sülen pa tanurtem kar den ball mapang tatsüka asaya aser Minreva Academy asayartem den ajurutepa liasü.

Deobarnü Mumbai nung Messi-i Sachin Tendulkar den ajurutep, shiba cricket asayar tajungtiba ka ta züngshir. India nung nungntugu cricket asayar yagi Messi nem pa asaya aliba mapang asemba Indian cricket team jersey ka agütsü aser Messi-i Sachin nem World Cup ball ka agüja liasü.

Tasembuba Ashes Test atema England team sangdongogo



England Team captain Ben Stokes

Luchii/December 15, 2025

(Agencies): Ben Stokes-i aniba England team-i Australia den Adelaide Oval nung Ashes asayamung nung tasembuba asaya atema asayatem sangdongogo. Team nung Gus Atkinson melen Josh Tongue shimogo, ta ESPNcricinfo-i metetdaksü.

Adelaide pitch ya spinner nem teyari agütsüba pitch ka lir, saka England team-i Shoaib Bashir meshimtsü atema telemtetba agia liasü. England-i iba asayamung 2-0 agi mekoki lir aser kechi südir süaka akoktsü nüngdakba Test ka

nung parnoki asayar karbo melentsü imla liasü.

Ajisüaka head coach Brendon McCullum-i yimjak nung tang junga masayateti aliba top seven asayartem pusema jembiba den pa aser captain Ben Stokes nati Gus Atkinson dang toktsütsü telemtetba agia liasü.

Iba asayamung nung Atkinson-i jung masayateti arudar. Pai over 54 nung wicket asem dang agir lir aser pa indang average 78.66 lir.

Pa melen England-i Josh Tongue shimogo. Tongue tang agi tenetbenbuba Test asayatsü

lir. Pa mezügbuba 2023 küm asaya. Pai tang tashi nung wicket 31 agir lir.

Tongue tang agi tanabenbuba Australia den asayatsü lir. Pa taoba Ashes asayaba mapang Lord's nung asayaogo, kong pai wickets pongu agi. Iba asaya nung pai innings anaprongla nung Steven Smith out süja liasü. Arishi küm 28 tain asayar yagi Smith ya pezüben out sütsür lir, kong 2023 County Championship nung Worcestershire aser Sussex na asayaba mapang pai Smith out sütsüba aser taküm The Hundred nung out sütsüba densema lir.

Tongue tatamsa India den asayaogo. Iba asayamung tatembangbuba asaya nung pai run 125 agütsür wicket 5 agi. Iba asayamung nung pai wicket 19 agia England team nungi wicket timtiba agiba asayar liasü.

Adelaide Test atema England team:

Zak Crawley, Ben Duckett, Ollie Pope, Joe Root, Harry Brook, Ben Stokes (c), Jamie Smith (wk), Will Jacks, Brydon Carse, Jofra Archer, Josh Tongue.

BILEMDANGANG

"Temelenshi asoshi peisasa mulungtettsüla."